

ebene Puncten k k: richte nun vber diesem Quadrangul den Stiffen in form eines Galgen vnnnd also auff / daß er vber der blinden Linie a y ganz winkelrecht lige. Vñ hastu nun auch also dise Uhr so artig vnnnd deutlich / als ich immer gekönt / beschrieben.

## Das eylffte Capitel.

Von Wänden vnd Mawrn / so bleyrecht auffgegen Mitternacht stehen / wie an die selbige / sie stehen gegen Mitternacht schmur stracks zu / oder weichen darvon ab / gegen dem Auff- oder Nidergang / viel oder wenig / doch allezeit vnder 90 gradus, nach der kunst / artig vnnnd mit sonderlichem vorthail Sonn- vhren zumachen.

Nach gethaner lehr / wie nemlich so wol auff einen wassergleich liegenden grund / als an die gegen Mittag bleyrecht auffstehende Wänden oder Mawrn Sonn- vhren zuverfertigen / will ich nun fortschreiten / vnnnd wie an die gegen Mitternacht bleyrecht auffstehende Wänden oder Mawrn Sonn- vhren zuverfertigen / auch lehren. Ob nun wol ich diese Vhren hiebevorn auß jren sonderlichen Fundamenten vnd Regula eine zeitlang auffgerissen / auch solche Fundamenten vnd Regula dißmahl gang leicht beschreiben werden konten: So hab jedoch ich auß fleißiger vielfaltiger in diesen sachen gehabter vbung so viel vermercket / daß solche Vhren auff einen sonderlichen lustigen vñ behenden griff / da man nur / wie an die gegen Mittag bleyrecht auffstehende Wänden oder Mawrn Sonn- vhren zumachen / weiß vnnnd gelernt / ohne weitläufftiges ferneres lehren / auch ohne fürschrreibung sonderlicher weitläufftiger newer Regula können gemacht vnnnd auffgerissen werden. Diesen griff nun / so wol mir als allen anderen dieser kunst liebhabern vnnöthige fernere müß zusparen / kürzlich anzuzeygen / so